

15. oktober 2019

UKA 2019/127

**Naalackersuisut Atuarfik pillugu Inatsisartut inatsisaannik allannguissaminni atuarfimmi klassimi ataatsimi atuartut annerpaamik 18-inik amerlassuseqartalernissaannik qulakkeerinnequllugit peqquneqarnissaannik Inatsisartut aalajangiiffigisassaattut siunnersuut.** (Inatsisartunut ilaasortaq Peter Olsen, Inuit Ataqatigiit)

Inatsisartuni ilaasortaq Peter Olsen Inuit Ataqatigiit siunnersuutaa Siumumiik imaattumik oqaaseqarfigissuarput.

Meeqqat angusarissaarnissaat atuarfiup angerlarsimaffiullu suleqatigiillu arnerisigut anguneqassaaq, taamaattumik angerlarsimaffiup atuarfiullu suleqatigiinnerat nukittorsartuartaqaripput Siumumi isumaqarpugut.

Atuarfitsialammi ilinniartitsisut pitsaanerpaanik tunngavissaqarnissaat atortussaqaarnissaallu qulakkeertariaqarparput, meeqqavut pitsaanerpaamik atuartinneqassappata. Tamatumunngalu ilanngullugu atuarfiit pisortaasa atuarfitsialammut naleqqussaannermut atatillugu aammalu ilinniartitsisut pikkorissartinneqartarnissaat periarfissaajuartaqarpoq.

Meeqqat atuarfianni angajullernut ilinniarfissanik siunnersuineq annertusarneqarlunilu pitsanngorsartariaqarpoq, amerlanerpaat ingerlaqqittarnissaat qulakkeerniarlugu.

Meeqqat atuarfianni ilinniartitsisut ilinniarsimasut amigaataanerat tunngavigalugu timelærinik, forskolelærinik perorsaasunillu atuisoqartarpoq. Ilisimavarpullu ukiuni makkunani tulliuttunilu ilinniartitsisorpassuit soraarnerussutisiaqalertussat amerlammata. Tamatuma malitsigissavaa ilinniartitsisunik ilinniarsimasunik amigaateqarnerulernissarput. Ilinniartitsisunik ilinniarsimasunik amigaateqarneq minnerulernaviangilaq atuartut klassiniissinnaasut ikilineqarpata, soorlumi Naalackersuisut akissuteqaataanni ernumassutigineqartoq illoqarfiit nunaqarfiillu Nuup avataaniittut sulii annertunerusumik ilinniarsimasunik amigaateqalernissaat.

Ilinniartitsisussaaleqineq qaangerniassagutsigu Ilinniartitaanermut Aqutsisoqarfik Ilinniarfissuarlu suleqatigiillu innartariaqarput aammattaaq najugarisami ilinniartitsisunngorniartarneq annertusaavigineqarluni. Taamaaliunngikkutta ilinniartitsisussaaleqineq sulii annertuneruleriartuinnassasooq qularnanngilaq.

Siunnersuuteqartup tunngavilersuutaa paasilluarsinnaagaluarlugu siuliani tunngavilersuutigisagut innersuussutigalugit siunnersuut maannangaaq Siumumiit ilalersinnaanngilarput kommunilli namminerisamik aaqqiissuteqarsinnaaner at inatsisitigut periarfissaammat tamanna kaammattuutigerusullugu.

Doris J. Jensen, Siumut